

Broniša bě serbska služobna ze Sedlišća, kiž jara špatnje němski, čím lěpje pak serbski rěčeše. Z cyła je w tamnej wsy hišće mnoho ludži, kiž němski lědma rozumja a so powědać hanibuja, wězo dokelž njemóža.

Sedlišćo wobsedzi cyrkej z wěžu, 1823 nowonatwarjenu, ale bjez farskeho bydła, kotraž njeje filia, ale sotra Komorowskeje. Patronat nad cyrkwu słuša Sedlišćanskej gmejnje, nad šulu pak knježerstwu. — Hač do l. 1820 je so w Sedlišćan cyrkwi jenož serbski předowało, potom stajnje najprjedy němski a na to serbski, wšo za sobu kaž so to hišće džensa w najwjacy delnjołužiskich wosadach stawa; to pak nic tohodla, zo ludžo nětko lěpje němski zrozumjachu — wšako hišće džensa z wulkeho džěla njerozumja — ale zo bychu so nuzowani wot duchowneho na němske předowanje zwučili a tak skónčnje jeho lěnosći polěkowali; přetož cyle, kaž bě wočakowane — štož hišće so naposluchať njebě abo komuž so hišće wostudziło njebě sedzeć — jenož tón hišće wosta tež na serbskim předowanju; hač pak bě so što na njezrozumjenym Božim słowje natwariť abo nic, wo to duchownemu starosć njebě! — Při tutym změšenju Božeje služby zastupichu tež němske spěwařske, a serbski cyrkwiny spěw přesta. — Wot lěta 1840 započa duchowny Šimjenc jenož němski předować a do němskeho předowanja krótke serbske wukładowanju toho, štož bě po jeho zdaću luděj njezrozumliwe, zapletować. Pozdžišo pak tutón dušow pastyr tež to wjacy za nuzne njeměješe a jenož hišće epistole a ewangelije němski a serbski čitaše; křćenicu a swjate wotkazanje pak praješe wón najprjedy němski a potom serbski. A hdžež bě wón sobu na serbskich kwasach, dyrbjachu ludžo jemu k woli němski rěčeć, by-li to tež šło a klinčało nanajžałostnišo. Wot l. 1865 pak w Sedlišćan cyrkwi žanoho słowčka serbski wjacy słyšeć njeje było. — Wobstojnosće w šuli njejsu lěpše. W l. 1818 so přeni woprawdžity wučer, mjenujcy Böhmer (rodź. 1800 w Šejkowje [Zschipkau] p. Komorowa, † 1871) postaji; prjedy toho wučachu krawcy a šewcy we wsy pódla swojeho rjemjesła n. př. krawc Dubk hač do l. 1818. Böhmer rozwučowaše, dokelž hinak njeńdžeše, zwjetša serbski, pruhowanja před superintendentom pak běchu němske, a tuž džěci ničo njemóžachu; tohodla bu Böhmer, kaž mi nětčiši wučer powědaše,